

四  
六  
叢  
話

四六叢話卷四

烏程 孫梅 輯

賦三一

先正有言曰使孔門用賦則賈誼升堂相如入室  
矣明小言之破道匪六藝之遺文也是以子雲悔  
其少作比之雕蟲士衡鄙夫研都譏以覆瓿漢宣  
僅賢于博奕昌黎深恥其俳優然而登高挾藻才  
堪大夫不歌而頌音中羣雅班固云先臣之舊式  
國家之遺美不可闕也兩漢以來斯道爲盛承學  
之士專精于此賦一物則究此物之情狀論一都

則包一朝之沿革輟翰傳誦勒成一子藩溷安筆  
硯夢寐剗腸胃一日而高紙價居然而驗土風不  
洵可貴歟左陸以下漸趨整鍊齊梁而降益事妍  
華古賦一變而爲駢賦江鮑虎步於前金聲玉潤  
徐庾鴻騫於後繡錯綺交固非古音之洋洋亦未  
如律體之靡靡也自唐迄宋以賦造士創爲律賦  
用便程式新巧以製題險難以立韻課以四聲之  
切幅以八韻之凡梈以重棘之圍刻以三條之燭  
然後銖量寸度與帖括同科夏課秋卷將揣摹共  
術矣徒觀其繩墨所設步驟所同起謂之破題承

謂之領接送迎互換其聲進退遞新其格李程以  
八字致倫魁爭先一着獨孤以一聯感人主力透  
數重圓邱隻字之轉移功候什伯採珠數言之精  
當氣骨非常竝轡轡往迴舉足叶采齊之奏方圓  
布置運機抵璇圖之文至於促韻繁聲道文勁節  
風迴聚雪柳暖飛綿或爲流水之聯或號打花之  
格隨手之變亦可單行壓尾之章恒多隔對行間  
得雋恍值腹而嘗其蟠字裏點睛自中心而遊於  
殼有如振采失鮮隸事未確是反衣之狐白等不  
熟之熊蹯無補清新祇乖典則又或前盈後竭譬

漢湧而潏枯左妍右媮類驥驂而駑服神離形合  
則魚目之無光外強中乾則砮玉之未瑩必也構  
局渾成首尾成率然之勢體物瀏亮分明隔雲母  
之間又何必矜敏於八父鍊思於一紀也若柳河  
東披沙揀金記里鼓車等作質有其文巧而兼力  
誠鴻博之新裁場屋之定式矣又有騷賦源出靈  
均幽情藻思一往而深則騷之真也班張優爲之  
又有文賦出荀子禮智二篇古文之有韻者是已  
歐蘇多有之皆非淺學所能學步也披尋之暇條  
件斯多于時語語聊當賦賦叙賦第三

賦敷也敷布其義謂之賦

釋名

賦者敷陳之稱古詩之流也前世爲賦者有孫卿屈原尚有古詩之義至宋玉則多淫浮之病矣楚詞之賦賦之善者也故揚子稱賦莫深于離騷賈誼之作則屈原儔也

文章流別論

古之作詩者發乎情止乎禮義情之發因辭以形之禮義之指須事以明之故有賦焉所以假象盡辭敷陳其志古詩之賦以情義爲主以事類爲佐今之賦以事形爲本以義正爲助情義爲主則言省而文有例矣事形爲本則言當而事無常矣文之煩省辭之險易蓋由於

此矣假象過大則與類相遠選辭過壯則與事相違辯  
言過理則與義相失麗靡過美則與情相浮此四過者  
所以背大德而害政教是以司馬遷割相如之浮說揚  
雄疾辭人之賦麗以淫詩之流也

同上

詩有六義其二曰賦賦者鋪也鋪采摘文體物寫志也  
昔邵呂覽作召公稱公卿獻詩師箴賦傳云登高能賦可爲

大夫詩序則同義傳說則異體總其歸塗實相枝幹劉  
向云明不歌而頌班固稱古詩之流也至如鄭莊之賦  
大隧士薦之賦狐裘結言拒韻詞自已作雖合賦體明  
而未融及靈均唱騷始廣聲皃然賦也者受命於詩人

拓疑作括

宇於楚辭也於是荀況禮智宋玉風釣爰錫名

號與詩畫境六義附庸蔚成大國遂

許云當作述

客主

元作至

以首引極聲

元脫曹補

貌以窮文斯蓋別詩之原始命賦之

厥初也秦世不文頗有雜賦漢初詞人順流而作陸賈

扣其端賈誼振其緒枚馬同其風王揚騁其勢臯朔

元作

勃曹改

已下品物畢圖繁積於宣時校閱於成世進御之

賦千有餘首討其源流信興楚而盛漢矣夫京殿苑獵

述行序志竝體國經野義尚光大旣履端於倡序亦歸

餘於總亂序以建言首引情本亂以理篇迭致文契按

那之卒章閔馬

元作焉朱改

稱亂故知殷人輯頌楚人理賦



斯竝鴻裁之寰域雅文之樞轄也至於草區禽族庶元

鹿曹品雜類則觸典致情因變取會擬諸形容則言務

纖密象其物宜則理貴側附斯又小制之區吟奇巧之

機要也觀夫荀結隱語事數自環宋發巧談實始淫麗

枚乘兔園舉要以會新相如上林繁類以成豔賈誼鵬

鳥致辨於情理子淵洞簫窮變於聲皀孟堅兩都明綯

元作朋約朱以雅贍張衡二京迅發一作以宏富子雲

考御覽改甘泉構深瑋之風延壽靈光含飛動之勢凡此十家竝

辭賦之英傑也及仲宜靡密發端必邁偉長博通時逢

壯采太冲安仁策勲於鴻規士衡子安底績於流制景

純綺巧縟理有餘彥伯梗槩情韻不匱亦魏晉之賦首  
也原夫登高之旨蓋覩物興情情以物興故義必明雅  
物以情觀故詞必巧麗麗詞雅義符采相勝如組織之  
品朱紫畫繪之著元黃文雖新而有質色雖粲而有本  
儀一作此立賦之大體也然逐末之儔蔑棄其本雖讀千  
賦愈惑體要遂使繁華損枝膏腴害骨無貴風軌莫益  
勸戒此揚子所以追悔於雕蟲貽誚於霧縠者也

文心

雕龍

王褒傳上令褒與張子僑等竝待詔數從褒等放獵所  
幸宮館輒爲歌頌第其高下以差賜帛議者多以爲淫

靡不急上曰不有博奕者乎爲之猶賢乎已辭賦大者  
與古詩同義小者辯麗可喜辟如女工有綺縠音樂有  
鄭衛今世俗猶皆以此虞說耳目辭賦比之尚有仁義  
風諭鳥獸草木多聞之觀賢於倡優博奕遠矣

漢書

梁孝王遊於忘憂之館集諸遊士各使爲賦枚乘爲柳  
賦其辭曰忘憂之館垂條之木枝逶遲而含紫葉萋萋  
而吐綠出入風雲去來羽族旣上下而好音亦黃衣而  
絳足蜩蟬厲響蜘蛛吐絲階草漠漠白日遲遲吁嗟細  
柳流亂輕絲君王淵穆其度御羣英而翫之小臣瞽瞍  
與此陳詞于嗟樂兮於是樽盈縹玉之酒爵獻金漿之

醪

梁人作諸蔗酒名金漿

庶羞千族盈滿六庖弱絲清管與風霜

而共雕鎗鏗啾唧蕭條寂寥倘父英髦列襟聯袍小臣  
莫效於鴻毛空銜鮮而噉醪雖復河清終無增景於邊

撥

西京雜記

路喬如爲鶴賦其辭曰白鳥朱冠鼓翼池干舉修距而  
躍躍奮皓翅之戔戔宛修頸而顧步啄沙磧而相歡豈  
忘赤霄之上忽池藻而盤桓飲清流而不舉食稻粱而  
未安故知野禽野性未脫籠樊賴吾皇之廣愛雖禽鳥  
兮抱恩方騰驤而鳴舞憑朱檻而爲歡

同上

公孫詭爲文鹿賦其詞曰麀鹿濯濯來我槐庭食我槐

葉懷我德聲質如紉緜文如素綦呦呦相召小雅之詩  
歎邱山之比歲逢梁王於一時

同上

鄒陽爲酒賦其詞曰清者爲酒濁者爲醴清者聖明濁  
者頑騃皆麴洧邱之麥釀野田之米倉風莫預方金未  
殷嗟同物而異味歎殊才而共侍流光醲醲甘滋泥泥  
醲醲旣成綠瓷旣啟且匡且漉載管載齊庶民以爲歡  
君子以爲禮其品類則沙洛淡鄒程鄉若下高公之清  
關中白薄青渚縈停凝醲醇耐千日一醒哲王臨國綽  
矣多暇召皤皤之臣聚肅肅之賓安廣坐列雕屏綃綺  
爲席犀璫爲鎮曳長裾飛廣袖奮長纓英偉之士莞爾

而卽之君王憑玉几倚玉屏舉手一勞四座之士皆若  
哺梁焉乃縱酒作倡傾盃覆觴右曰宮中旁亦徵揚樂  
只之深不狂於是錫名餌祛夕醉遣朝醒吾君壽億萬  
歲常與日月爭光

同上

公孫乘爲月賦其辭曰月出皦兮君子之光鷗雞舞於  
蘭渚蟋蟀鳴於西堂君有禮樂我有衣裳猗嗟明月當  
心而出隱員巖而似鉤蔽修堞而分鏡旣少進以增輝  
遂臨庭而高映炎日匪明皓壁非淨躔度運行陰陽以  
正文林辯囿小臣不佞

同上

羊勝爲屏風賦其辭曰屏風鞞匝蔽我君王重葩累繡

省壁連璋飾以文錦映以流黃畫以古烈禺禺昂昂藩  
后宜之壽考無疆

同上

韓安國作几賦不成鄒陽代作其辭曰高樹凌雲蟠紆  
煩寃旁生附枝王爾公輪之徒荷斧斤援葛藟攀喬枝  
上不測之絕頂伐之以歸眇者督直聾者磨礱齊貢金  
斧楚入名工乃成斯几彷彿似龍盤馬迴鳳去鸞歸君  
王憑之聖德日躋鄒陽安國罰酒三升賜枚乘路喬如  
絹人五匹

同上

張融傳融作海賦文辭詭激獨與衆異後以示鎮軍將  
軍顧覲之覲之曰卿此賦實超元虛但恨不道鹽耳融

卽求筆注曰漉沙構白熬波出素積雪中春飛霜暑路

此四句後所足也

南史

王筠傳沈約製郊居賦構思積時猶未都畢乃要筠示

其草筠讀至雌霓

五激反

連蜷約撫掌欣忭曰僕嘗恐人

呼爲霓次至墜石礚星及冰懸炤而帶坻皆擊節稱贊

約曰知音者希真賞殆絕所以相要正在此數句耳

梁

書

劉劭趙都賦云公子之客叱勁楚令歆盟管庫隸臣呵

強秦使鼓缶用事如斯可謂理得而義要矣

文心雕龍

石守道介於首善堂出題曰諸生請皇帝幸國學賦中



有一賦云今國家始建十親之宅新封八大之王蓋是年造十王官封八大王元儼爲荆王之事也

湘山野錄

世又謂易水爲故安河武陽蓋燕昭王之所城也東西二十里南北十七里故傳逮述遊賦曰出北薊歷良鄉登金臺觀武陽兩城遼廓舊迹冥茫蓋謂是處也

水經

注

秦始皇三十五年於胸縣立石海上以爲秦之東門崔炎述初賦曰倚高艫以周盼兮觀秦門之將將者也東北海中有大洲謂之郁洲山海經所謂郁山在海中者也言是山自蒼梧從此云山上猶有南方草木今郁洲

治故崔季珪之敘述初賦言郁洲者故蒼梧之山也心  
悅而怪之其上有仙土石室也乃往觀見一道人獨處  
休休然不談不對顧非已及也卽其賦所云吾夕濟於  
郁洲者也 同上

昭德里有司農張倫宅最爲豪侈齋宇光麗逾於邦君  
園林山池之美諸王莫及倫造景陽山有若自然其中  
重巖複峻嶽崱相屬深溪洞壑邐迤連接高林巨樹足  
使日月蔽虧懸葛垂蘿能令風煙出入崎嶇石路似壅  
而通崢嶸澗道盤紆復直是以山情野興之士游以忘  
歸天水人姜質志性疎誕麻衣葛巾有逸民之操見偏

愛之如不能已遂造亭山賦行傳於世

洛陽仰藍記

曹毗湘中賦曰竹則篋簍白鳥實中紺族濱榮幽渚繁

宗隈曲萋蒨陵邱薺逮重谷

齊民要術

案筍譜白鳥筍湘中有此竹生是筍又有實中筍

王彪之作閩中賦曰竹則苞甜赤若縹箭斑弓度世推

節征合實中篋簍函人桃枝育蟲紺簍素筍彤竿綠筒

篋簍竹節中有物長數寸甚似世人形俗說相傳云竹人時有得者育蟲謂竹髓竹中皆有耳因說桃枝可

言得寄同上

案戴凱之竹譜云箊竹江漢之間謂之斂竹一尺數

節葉大如履卽所云湘箊也

或問顧長康君箏賦何如嵇康琴賦顧曰不賞者作後  
出相遺深識者亦以高奇見貴

世說

齊武穆裴皇后傳韓蘭英吳郡人有文辭宋孝武時獻  
中興賦被賞入宮宋明帝時用爲宮中職僚

南史

蔣凝應鴻詞爲賦止及四韻頃刻之間播于人口或稱  
之曰白頭花鈿滿面不若徐妃半粧

燕言

同華解與京兆無異若首送無不捷者元和中令狐文  
公鎮三峰時及秋賦榜云特加置五場蓋詩歌文賦帖  
經爲五場常年以清要書題求薦者率不減十數入其  
年莫有至者雖不遠千里而來聞是皆寢去惟盧宏正

獨詣華請試公命供帳酒饌侈靡於往時華之寄客畢  
縱觀于側宏正自謂獨步文場公命曰試一場務精不  
務敏也宏正已試兩場而馬植下解狀一本無植將家  
子弟從事輩皆竊笑公曰此未可知旣而試登山採珠  
賦略曰文豹且異于驪龍採斯疎矣白石且殊于老蚌  
剖莫得之公大伏其精當遂奪宏正解元後宏正自丞  
郎使判離俄而爲植所據宏正以手札戲曰昔日華元  
已遭毒手今來離務又中老拳同上

李繆公貞元中試日五色賦先榜落矣先是出試楊於  
陵省宿歸第過程於省司詢之所試程探鞞鞫中得賦

藁示之其破題云德動天鑒祥開日華於陵覽之謂程  
曰公今年須作狀元翼日雜文無名於陵深不平乃于  
故冊子末繕寫而斥其名氏攜之以詣主文從容給之  
曰侍郎今者所試賦柰何用舊題主文辭以非也於陵  
乃出程賦示之主文歎賞不已於陵曰當今場中若有  
此賦侍郎何以待之主文曰無則已有則非狀元不可  
也於陵曰苟如此侍郎已遺賢矣乃李程所作亟命取  
程所納面對不差一字主文因而致謝於陵於是請擢  
爲狀元前榜不復收矣李繆公後出鎮大梁聞浩虛舟  
應宏詞復試此題頗慮浩賦愈已專馳一介取本旣至

啟緘尚有憂色及觀浩破題云麗日焜煌中含瑞光程

喜曰李程在裏

同上

貞元中白樂天應宏詞試漢高祖斬白蛇賦考落蓋賦  
有知我者謂我斬白帝不知我者謂我斬白蛇也登科  
之人賦竝無聞白公之賦傳於天下

同上

江左之亂江陰尉鄒侍微妻薄氏爲盜所掠密以其夫  
官誥託於村媼而後死之李華爲哀節婦賦行於當代  
唐國史補

徐陵鴛鴦賦云山雞映水那相得孤鸞照鏡不成雙天  
下真成長會合無勝比翼兩鴛鴦黃魯直題畫睡鴨曰

山雞照影空自愛孤鸞舞鏡不成雙天下真成長會合  
兩鳬相倚睡秋江全用徐語點化之末句尤精工

容齋

隨筆

杜牧之晚晴賦雜花如妾如婢

五色線

劉禹錫獻權舍人書曰昔宋廣平之沈下僚也蘇公味  
道時爲直指使者廣平投以梅花賦蘇盛稱之自是方  
列於聞人之目名遂振

全唐詩話

崔融瓦松賦序曰崇文館瓦松者產於屋漏之下謂之  
木也訪山客而未詳謂之草也驗農皇而罕記賦云煌  
煌特秀狀金芝之產雷歷歷虛懸若星榆之種天葩條



郁毓根抵連卷閒紫苔而挹露凌碧瓦而含煙又曰慚  
魏宮之烏柏慙漢殿之紅蓮崔公學博無不該悉豈不  
知瓦松已有著說乎

酉陽雜俎

高郢夜課於豐亭忽見一鼈在案上視之石也郢異其  
事取手題置散紙中禱祝令石鼈啣之以卜來事旣而  
石鼈舉頭乃是沙洲獨鳥賦題出果然其年首選

雲仙

雜記

江適作竹賦云望春擢筍應秋發堅

筍譜

隋蕭大圖竹花賦云洛下七賢湘中二女傾翠蓋之脚  
蹠泛蓮洲之容與侑儻傲人便娟笑語拊嫩筍以含啼

顧貞筠而命醕

同上

杜臺卿作淮賦云綠筒縹箭竿節疎目檳榔之筍盛冬  
所育

同上

吳筠簪竹賦云一筍明其元嗣三節獲乎嬰兒

同上

或問筍有五色章采否對曰江東黃筍閒居賦有青筍  
閩中賦有素筍赤筍錢塘多紫桂筍自餘斑狸細縹不  
可勝言

同上

莒公嘗言王沂公所試有教無類有物混成賦二篇在  
生平論著絕出若有神助云楊億大年亦云自古文章  
立名不必多如王君二賦一生衣之食之不能盡

筆記

唐呂溫作由鹿賦曰由此鹿以致他鹿故曰由鹿予按  
說文曰率鳥者繫生鳥以來之名圖圖音由呂得其意  
而不知說文有此圖字也

同上

右登白樓賦令狐楚撰白樓在河中至楚子絢爲河中  
節度使乃刻於石絢父子爲唐顯人仍世宰相而楚尤  
以文章見稱世傳絢爲文喜以語簡爲工常飯僧僧判  
齋絢於佛前跪爐諦聽而僧倡言曰令狐絢設齋佛知  
蓋以此譏其好簡楚之此賦文無他意至千有六百餘  
言何其繁也其父子之性相反如此信乎堯朱之善惡  
異也

六一題跋

書子由超然臺賦後子由之文詞理精確有不及吾而  
體氣高妙吾所不及雖各欲以此自勉而天資所短終  
莫能脫至於此文則精確高妙殆兩得之尤爲可貴也  
東坡題跋

予在資善堂與吳傳正爲世外之遊始余嘗作洞庭春  
色賦傳正獨愛重之求予親書其本近又作中山松醪  
賦不減前作獨恨傳正未見

同上

晏元獻知貢舉出司空掌輿地之圖賦旣而舉人上請  
者皆不契元獻之意最後一目眊瘦弱少年獨至簾前  
上請云據賦題出周禮司空鄭康成注云如今之司空

掌輿地圖也若周司空不止掌輿地之圖而已若如鄭  
說今司空掌輿地之圖也漢司空也不知倣周司空與  
漢司空也元獻微應曰今亡場中惟賢一人識題正謂  
漢司空也蓋意欲舉人自理會得寓意于此少年舉人  
乃歐陽公也是榜爲省元

默記

李宗道春秋十賦屬對之工如越椒熊虎之狀弗殺必  
滅若敖伯石豺狼之聲非是莫傷羊舌王子爭囚而州  
犁上下伯輿合要而范宣左右魯昭之馬將爲犢衛懿  
之鶴有乘軒于奚辭邑而衛人假之器晉侯請隧而襄  
王與之田星已一終魯君之歲亥有二首絳老之年作

楚宮見襄公之欲楚效夷言知衛侯之死夷雞憚犧而斷其尾象有齒而焚其身虞不臘矣吳其沼乎好魯以

弓請謹守寶賜鄭以金盟無鑄兵蛇出泉臺聲姜薨鳥

鳴毫社伯姬卒

若環案歐陽公年譜年十七應舉隨州試左氏失之誣論中云石言於晉神降

于莘外蛇鬪而內蛇傷新鬼大而故鬼小雖不中人猶傳誦之但誣原本定作巫出范寧穀梁傳序巫者謂多

敘鬼神之事也

困學紀聞

紹興壬戌夏顯仁皇后歸就九重之養伯氏仲信年十

八作慈寧殿賦以進

揮塵餘話

莊子云雲氣不待族而雨族聚也未聚而雨言澤少也

李義山雪賦云雲市颺蕩當從於月月窟漸瀝合隨於

雲市云族云市亦奇字

臆乘

案樊南甲乙集初無雪賦篇題未知何所據而有此

聯

退之閔已賦獨閔閔其曷已兮馮文章以自宣昔顏氏  
之庶幾兮在隱約而平寬固哲人之細事兮夫子乃嗟  
歎其賢詩考槃考槃在澗碩人之寬獨寐寤言永矢勿  
諼寬音區權切裕也  
諼寬也諼光元切芥隱筆記

山谷作蘇李枯木道士賦有懼夫子之獨立矢來無鄉  
出韓非子矢來有鄉鄉方也有從來之方則積鐵以備  
一鄉謂聚鐵一身以備一處則甲之不全者矢來無鄉

則鐵室以盡備之謂甲之全者自首至足無不有鐵故  
曰鐵室備之則體不傷破

同上

前赤壁賦自惟江上之清風與山間之明月至相與枕  
藉乎舟中不知東方之既白却只用李白清風明月不  
用一錢買玉山自倒非人推一聯十六字演成七十九  
字愈奇妙也

學齋佔畢

莊周之書有鷦鷯巢林不過一枝又曰鵬搏扶搖九萬  
里而風斯在下蓋齊物之論也後世有本其說而賦之  
者如張茂先賦鷦鷯自譬甚小李太白賦大鵬自譬甚  
大皆適其性而已不出莊周齊物之論耳

同上



往年俞文緯監試預薦赴省相過因話賦假人名善體  
狀題意者莫若武爲救世砭劑云唐室中興賴藥師而  
克濟漢家外患藉去病以皆除余嘗賦化下猶甄者欲  
以陶唐堯舜爲一聯使於變時雍猶鈞埴風動四方  
器不苦窳事也曾與舍弟碩夫邁昆仲儕輩商量莫不  
領略此說

螢雪叢說

昔有士人在場屋中賦帝王之道出萬全絕無故實遂  
問一老先生荅云只有一舉空朔庭三箭定天山好使  
要在人幹旋爾或謂此事乃人臣非帝王也後於程文  
中見一舉人使得最妙其說題目甚透有曰一舉朔庭

空寶憲受成於漢室三箭天山定薛侯稟命于唐宗真所謂九轉丹砂點鐵成金者也

同上

文章一技要自有活法若膠古人之成跡而不能點化其語句此乃謂之死法死法專祖蹈襲則不能生於吾言之外活法奪胎換骨則不能斃於吾言之內斃吾言者生吾言也故爲活法伊川先生嘗說中庸鳶飛戾天魚躍於淵須知天上者更有天淵中更有地會得這道理便活潑潑地吳處厚嘗作剪刀賦第五隔對去爪爲犧救湯王之旱歲斷髮燒藥活唐帝之功臣當時屢竄易唐帝上一字不爰帖因看游鱗頓悟活字不覺手舞

足蹈呂居仁嘗序江西宗派詩若言靈均自得之忽然有入然後惟意所出萬變不窮是名活法楊萬里又從而序之若曰學者屬文當悟活法所謂活法者要當優游厭飫是皆有得於活法也吁有胸中之活法蒙於伊川之說得之有紙上之活法蒙於處厚居仁萬里之說得之同上

曩者吳叔經鄂在湖南漕試以本經詩義取解魁次名陳尹賦文帝前席賈生破題云文帝好問賈生力陳忘其勢之前席重所言之過人叔經先生改勢字作分陳大欽服內有打花格云金蓮燭煥煌煌漢天子之儀玉

漏聲沈纏纏洛陽人之語試官已喜此一聯又陳季陸在福州考較出皇極統三德五事賦魁者破題云極有所會理無或遺統三德與五事貫一中於百爲季陸先生極喜闕初二句只嫌第四句不是貫百爲於一中似乎倒置改貫字作寓較有意思尤喜陳舜申三策第三道策題問屯田乃先生撰也最是荅得工夫此皆二公之警誨也

同上

相如將獻賦未知所爲夢一黃衣翁謂曰可爲大人賦遂作大人賦言神仙之事以獻之賜錦四疋

西京雜記

東坡幼年作却鼠刀銘公作缸硯賦曾祖稱之命佳紙

修寫裝飾釘於所居壁上

藥城遺言

公曰吾少年苦不達爲文之節度讀上林賦如觀君子佩玉冠冕還折揖讓音吐皆中規矩終日威儀無不可觀

同上

公曰余黃樓賦學兩都也晚年來不作此工夫之文公曰范蜀公少年儀矩任眞爲文善腹橐作賦場屋中默坐至日晏無一語及下筆頃刻而就同試者笑之范公遂魁成都

同上

莊子內篇德充符云自其異者觀之肝膽楚越也自其同者視之萬物皆一也東坡赤壁賦云蓋將自其變者

觀之雖天地曾不能以一瞬自其不變者觀之則物與我皆無盡也而又何羨乎蓋用莊子語意

林下偶談

傳曰不歌而頌謂之賦登高能賦可以爲大夫言感物造端材智深美可與圖事故可以爲列大夫也

漢書

余少時愛揚子雲麗文高論不量年少猥欲追及嘗作小賦用情思大劇而立感動發病子雲亦言成帝上甘泉詔使作賦爲之卒暴倦臥夢其五臟出地以手收之覺大小氣病一歲余喜好文見子雲善爲賦欲從之學子雲曰能讀千首賦則善爲之矣

桓譚新論

余少時爲奉車郎孝成時幸甘泉宮欲書壁爲之賦以

頌美二仙之行余承命爲作仙賦以書甘泉之壁

同上

禍衡傳人有獻鸚鵡者射舉厄于衡曰願先生賦之衡

攬筆而作文無加點辭采甚麗

後漢書

范文正公作金在鎔賦云儻令區別妍媸願爲軒鑑若使削平禍亂請就干將則公負將相器業文武全才亦

見於此賦矣

青箱雜記

王沂公有物混成賦不縮不盈賦象寧窮於廣狹匪雕匪斲流形罔滯於盈虛則宰相陶鈞運用已見於此賦

矣

同上

上於內殿前看牡丹翹足憑欄忽吟舒元興牡丹賦曰

俯者如愁仰者如語合者如咽吟罷方省元興詞不覺  
歎息良久泣下沾臆

杜陽雜編

案上謂唐文宗也

林傑年六歲請舉童子後業詞賦頗振聲問有仙客入  
壺中賦云仙客以變化隨形逍遙放情處於外則一壺  
斯在入其中則萬象俱成飛閣重樓不是人間之世奇  
花異草無非物外之名無不嘉獎

閩川士傳

尹知章字文叔絳州人少時性慵夢一赤衣人持巨鑿  
破其腹若內草茹於心中痛甚驚寤自後聰敏爲流輩  
所尊開元中張說嘗請于朝上召見延英上問曹植幽



思賦何爲遠取景物爲句意旨安在知章對以植所謂  
賦作不徒然若倚高臺之曲隅望且重也處幽僻之間  
深位至卑也望翔雲之悠悠嗟朝霽而夕陰以爲物無  
止定之意而上多改易也顧秋華之零落歲將暮也感  
歲暮而傷心年將易也觀躍魚於南沼使智者居於明  
非得志也聆鳴鶴於北林怨且和也擲素筆而慷慨守  
文而感也揚大雅之哀今憫其時也仰清風以歎息思  
濯煩也寄予思於悲絃志在古也信有心而在遠措者  
大也重登高以臨川及上下也何余心之煩錯寧翰墨  
之能傳意不盡也此幽思所以賦也上敬異之擢禮部

侍郎集賢院正字

龍城錄

酒徒鮑生家富畜妓開成初行歷陽道中止定山寺遇  
外弟韋生下第東歸同憩水閣鮑置酒酒酣韋謂鮑曰  
樂妓數輩焉在得不有攜者乎鮑生曰滯維揚日連甃  
數駒後乘旣闕不果悉從惟與夢蘭小倩俱今亦可以  
佐歡矣頃之二雙鬟抱胡琴方響而至遂坐韋生鮑生  
之右縱絲轡金響亮溪谷酒闌鮑謂韋曰山城得良馬  
乎對曰予春初塞游自鄜坊厯烏延抵平夏止靈武而  
迴部落駟駿獲數匹龍形鳳頸鹿脰鳬膺眼大足輕脊  
平肋密者皆有之鮑撫掌大悅乃停杯命燭閱馬於軒

檻前數匹與向來誇誕十未盡其八九韋戲鮑曰能以人換任選殊尤鮑欲馬之意甚切密遣四絃更衣盛粧頃之乃至命捧酒勸韋生歌一曲以送之韋乃召御者以紫叱撥酬之鮑意未滿往復之說素然無章有紫衣冠者二人導從甚盛自水閣之西升階而來鮑韋以寺當星使交馳之路疑大僚夜至乃恐悚入室闔戶以窺之而杯盤狼藉不暇收拾時紫衣卽席相顧笑曰此卽向來以妾換馬之筵乎因命酒對飲一人鬚髯甚長質貌甚偉持杯望月沉吟久之曰足下盛賦云斜漢左界北陸南囷白露暖空素月流天可得光前絕後矣對月

殊不見賞風霽地表雲歛天末洞庭始波木葉微脫長  
髯云數年來在長安蒙樂遊王引至南宮入都堂與劉  
公幹鮑明遠看試秀才余竊入司文之室於燭下窺能  
者制作見屬對頗切而賦有蜂腰鶴膝之病詩有重頭  
重尾之犯若如足下洞庭木葉之對爲紕繆矣小子拙  
賦云紫臺稍遠燕山無極涼風忽起白日西匿則稍遠  
忽起之聲俱遭黜退矣不亦異哉今珠露旣清桂月如  
畫吟詠時發杯觴間行能援筆聯句賦今之體調一章  
以樂長夜否曰何以爲題長髯云便以妾換馬爲題仍  
以捨彼傾城求其駿足爲韻命左右折庭前芭蕉一片

啟書囊抽毫以操之各占一韻長髯者唱云彼佳人兮  
如瓊之英此良馬兮負駿之名將有求於逐日故何惜  
於傾城香暖深閨永厭桃花之色風清廣陌曾憐噴玉  
之聲希逸曰原夫人以矜其容馬乃稱其德既各從其  
所好諒何求而不克長跪而別姿容休耀其金鈿右牽  
而來光彩頓生於玉勒文通曰步及庭砌効當軒墀望  
新恩俱非吾偶也戀舊主疑借人乘之香散綠驥意已  
忘於鬢髮汗流紅頰愛無異於凝脂希逸曰是知事有  
興廢用有取舍彼以絕代之容爲鮮矣此以軼羣之足  
爲貴者買笑之恩既盡有類卜之據鞍之力尚存猶希

進也文通賦四韻訖芭蕉盡韋生發篋取紅箋跪獻於  
庶下二公大驚曰幽顯路殊何見通之甚然吾子非後  
有爵祿不可與鄙夫相遇謂生曰異日主文柄較量俊  
秀輕重無以小巧爲意也言訖二公行十餘步間忽不  
知其所在

纂異記

張九齡傳九齡內懼恐遂爲李林甫所危因帝賜白羽  
扇乃獻賦自況其末曰縱秋氣之移奪終感恩於篋中

唐書

處士史虛白北海人也清太中客游江表卜居鄱

一作潯

陽落星灣遂有終焉之志嘗對客奕棋旁令學徒四五

輩各秉紙筆先定題目或爲書啟表章或詩賦碑頌隨  
口而書握管者略不停綴數食之間衆製皆就雖不精  
絕然詞采磊落旨趣流暢亦一代不羈之才也晚節放  
達好乘雙犢板輟挂酒壺於車上小山一作童總角負瓢  
以隨往來廬阜之間任意所適當時朝士咸所推仰保  
大末淮甸未寧割江之際虛白乃爲割江賦以諷曰舟  
車有限沿汀島以俱閑魚鼈無知尚交遊而不止南唐  
近事

嘗見曲中使柳三眠事不知所出後讀玉谿生江之嫺  
賦云豈如河畔牛星隔歲止聞一過不比苑中人柳終

朝僅得三眠

江之嫺者江鄉之美人也讀其詩者自可會之

漫叟詩話

杜荀鶴與張署同年進士常以言相嘲諢曙之他文不多見康餘錄載其擊甌賦一篇其警句云董雙成青瑣鸞驚啄開珠網穆天子紅韁馬駭踏碎瓊田似此之類恐非荀鶴所可擬

藝苑雌黃

喬彝京兆府解試時有二試官彝日午叩門試官令引入則已醺醉視題曰幽蘭賦不肖作曰兩漢相對作得此題速改之遂改渥洼馬賦曰此可矣奮筆斯須而成警句云四蹄曳練翻瀚海之驚瀾一噴生風下湘山之亂葉便欲首送京兆曰喬彝崢嶸甚以解副薦之可也



幽閒鼓吹

崔公度伯易自號曲轅先生作太行山賦以太行近時  
忌改作感山賦裴煜得之獻魏公未及品藻示永叔永  
叔題其後曰司馬子長之流也魏公因薦其文授潁川  
防禦推官國子監直講荆公嘗云感山賦不若明珠賦  
孫公談圃

張登長於小賦氣宏而密閒不容髮有織成隱起往往  
蹙金之狀

零陵小記

秦少游論賦至悉曲盡其妙蓋少時用心於賦甚勤而  
專嘗記前人所作一二篇至今不忘也

師友談記

少游言賦中作用與雜文不同雜文則事辭在人意氣變化若作賦則惟貴鍊句之功關難關巧關新借如一事他人用之不過如此吾之所用則雖與衆同其語之巧迴與衆別然後爲工也

同上

國朝前輩多循唐格文冗事迂獨宋范滕鄭數公得名於世至於嘉祐之末治平之間賦格始備廢二十餘年而復用當時之風未易得也已

同上

綠沈事人多不知老杜云雨拋金鎖甲苔臥綠沈槍又皮日休竹詩云一架三百本綠沈森冥冥始知竹名矣又見吳淑事類弓賦云綠沈亦復精堅引廣志曰綠沈

古弓名又引劉劭趙郡賦曰其器用則六弓四弩綠沈

黃閒棠溪魚腸了令角端

侯鯖錄

公亟稱李衛公之文謂不減燕許每讀積薪賦曰雖後來之高處必居上而先焚真文章之精致也

王氏談錄

文章純古不害其爲邪文章絕麗亦不害其爲正然世或見人文章鋪陳仁義道德便謂之正人君子及花草月露便謂之邪人茲亦不盡然也皮日休曰余嘗慕宋璟之爲相疑其鐵腸與石心不解吐婉媚辭及觀其文而有梅花賦清便富艷得南朝徐庾體

青箱雜記

范文正公始以獻百官圖譏切呂許公坐貶饒州梅聖

俞時官旁郡作靈鳥賦以寄所謂事將兆而獻忠人翻  
謂爾多凶蓋爲范公設也故公亦作賦報之有言知我  
者謂吉之先不知我者謂凶之類及公秉政聖俞久困  
意公必援已而漠然無意所薦乃孫明復李泰伯聖俞  
有違言遂作靈鳥後賦責之略云我昔閔汝之忠作賦  
弔汝今主人誤豐爾食安爾巢而爾不復啄叛臣之目  
伺賊壘之去反憎鴻鵠之不親愛燕雀之來附意以其  
西師無成功世頗以聖俞爲隘

石林燕語

王文正公爲相南省試當仁不讓於師賦時賈邊李迪  
皆有名場屋及奏名而邊迪不與試官取其文觀之迪

以落韻邊以師爲衆與注疏異特奏令就御試王文正  
議落韻失於不詳審耳若舍注疏而立異論不可輒許  
恐從今士子放蕩無所準的遂取迪而黜邊

龍川別志

學林云皇祐中京師試止戈爲武賦張弼首選頗以此  
賦馳名第七韻曰亦猶日並月以爲明紀天之象王居  
門而曰閨重歲之餘今案字書明從囧不從日賦誤用  
之害理之甚以上皆學林語予案說文明字有二其一  
從囧其一從日皆可而學林乃謂從日者爲害理殊可  
一笑

雲谷雜記

孔子弟子琴張琴牢也子張乃姓顓孫名師紹興中太

學試仁天之尊爵賦取上第一人第二人皆以琴張爲  
子張第一人云琴張難與終懷干祿之疑第二人云笑  
琴張難與並爲徒懷干祿而試官與舉人皆不悟抑何  
鹵莽至此耶

藝圃閒評

顧眄之眄乃音面字今觀東哲餅賦云氣勃鬱以揚布  
香飛散而遠徧行人垂涎於下風董僕空噍而斜眄擎  
器者舐脣立侍者乾咽眄字乃與徧字咽字同押則知  
古人用眄字自讀爲面字矣

同上

陸龜蒙筍賦云洪殺靡定方圓不均自註云南方有方  
竹今澧川鐵冶多方竹竹內實微通心若釵股許筍可

食亦實湘川人取竹作牀椅有四稜上穿孔入當耳筍譜

周緘爲角觥賦云前衝後敵無非有力之人左攫右擎

盡是用拳之手夢溪筆談

觀象賦後魏張淵撰

見後魏書

初學記云宋張鏡非也大象

賦唐志謂黃冠子李播撰李台集解播淳風之子也今本題楊炯撰畢懷亮注館閣書目題張衡撰李淳風注薛士龍書其後曰專本巫成星贊旁覽不及隋書時君能致諸蘭臺臥渾儀之下其所論著何止此耶愚觀賦之末曰有少微之養寂無進賢之見譽恥附耳以求達

方卷舌以幽居則爲李播撰無疑矣播仕隋高祖時棄  
官爲道士時未有隋志非旁覽不及也張衡著靈憲楊  
炯作渾天賦後人因以此賦附之非也

困學紀聞

莊子有傳說乘東維騎箕尾而比于列星古賦有云傳  
說奉中閭之祠傳說一星在尾北後河中蓋後宮女巫  
也說爲商良相豈爲後宮女巫祈子而禱祠哉此天宮  
之難明者也

同上

賈誼賦見細德之險微顏注云見苛細之人險阨之證  
則微當作徵見險證而去色斯舉矣見幾而作

同上

梁書謝徵傳徵字元度陳郡陽夏人與河東裴子野沛



國劉題同官友善子野嘗爲寒夜直宿賦以贈徵徵爲感友賦以酬之

同上

吳子曰承桑氏之君修德廢武以滅其國柳子佩韋賦桑宏和而却武兮渙宗覆而國舉桑謂承桑氏也

一本改桑

爲乘 同上

揚雄覈靈賦曰大易之始河序龍馬洛貢龜書劉牧謂河圖洛書同出伏羲之世

同上

左思白髮賦星星白髮生於鬢垂詩用星星字出於此

同上

楊泉賦序曰古人作賦者多矣而獨不賦蠶乃爲蠶賦

是何言歟楚蘭陵荀況有鰲賦

金樓子

何涓爲瀟湘賦天下傳之同時潘緯以古鏡詩著名或

曰潘緯十年吟古鏡何涓一夕賦瀟湘

撫言

放翁豐城劍賦謂吳亡而氣猶見其應晉室之南遷愚

謂豐城二劍事出雷次宗豫章記所謂孔章者卽雷煥

也蓋次宗之族此劉知幾所云莊子鮒魚之對賈生鵬

鳥之辭施於寓言則可求諸實錄則否而唐史官之撰

晉史者取之後人因而信之誤矣顏師古注漢書凡撰

述方志新異穿鑿者皆不錄注史猶不取況作史乎

豫章

記見藝文類聚

困學紀聞

揚雄河水賦曰登厯觀而遙望兮聊浮遊於河之巖今  
雷首山西枕大河

水經注

昔公子重耳出亡及柏谷卜適齊楚狐偃曰不如之翟  
漢武帝嘗微行此亭見餽亭長妻故潘岳西征賦曰長  
微客於柏谷

微客賦作微賓

妻觀貌而獻餐謂此亭也

同上

漢武微行柏谷遇辱竇門又感其妻深識之饋既返玉  
階厚賞賚焉賜以何津令其鬻渡今竇津者是也故潘  
岳西征賦酬匹婦其已泰胡厥夫之謬官袁豹之徒竝  
以爲然

同上

司馬彪袁松郡國志竝在湟縣有關與聚盧湛征艱賦

曰訪梁榆之虛郭

宋本作郭

弔闕與之舊平桓

案桓字誤似是松字謂袁

松

也亦云闕與今梁榆城是也

同上

嘉定甲申夏有持潁濱先生帖十數幅求售蹤跡所自  
知非贗物其有黃樓賦一篇讀之其間前則項籍劉戊  
一句觀瀾文作劉備潁濱集作劉季觀瀾文注云徐州  
牧陶謙病篤謂別駕麋竺曰非劉備不能安此邦及謙  
死竺率州人迎先主先主未敢當陳登孔融曉諭之先  
主遂領徐州劉戊乃楚元王交之子也漢六年旣廢楚  
王信分其地爲二國立劉賈爲荆王交爲楚王王薛郡  
東海彭城三十六縣先有功也交薨戊嗣稍淫暴遂應

吳王反起兵會吳與周亞夫戰絕吳糧道士饑吳王走  
戊自殺彭城卽徐州先主之意蓋以此也不知當日作  
劉備劉季而後來易以戊耶或傳寫訛謬而意其爲備  
爲季耶要當以手書爲定也

游宦紀聞

趙樞子克其主文有藻鑒多得人者曰張景仁御史

金史

字壽甫  
遼西人

鄭子時侍讀故一時爲之語曰主司非張鄭秀

才非趙孟律賦至今學者法之然其源出於吾高祖南  
山翁故老云孟晚進初不識翁因少年下第發憤闢一  
室取翁賦翦其八韻類之帖壁閒坐臥諷詠深思已而  
盡得其法下筆造微妙再試魁於鄉於府於省於御前

天下號孟四元迄今學者以吾祖孟師也孟雖仕不甚  
貴作詩詞有可稱自號虛靜居士頗恬淡畱意養生術  
嘗著金丹賦行于世其詩詞亦有集

歸潛志

王彪天賦云溥爲地蓋浩作星衢

清異錄

王彪臨池賦云碧氏方澄宅龜魚爲蕩漾綠卿高拂宿

煙霧以參差

同上

韓中書俾舒雅作鶴賦有曰脊彼軒郎治茲松府

同上

羊紹素夏課有畫狗馬難爲功賦其實取畫狗馬難於  
畫鬼神之意也投表兄吳子華子華覽之謂紹素曰吾  
子此賦未嘉賦題無鬼神而賦中言鬼神子盍爲畫狗

馬難於畫鬼神賦卽善矣紹素未及改易子華一夕成於腹笥有進士韋彖池州九華人始以賦卷謁子華子華聞之甚喜彖居數日貢一篇於子華其破題云有丹青二人一則矜能於狗馬一則誇妙於鬼神子華大奇之遂焚所著而紹素竟不能以已下之其年子華爲彖取府解

撫言

高貞公郢就府解後時試官別出題目曰沙州獨鳥賦郢援筆而成曰歟有飛鳥在河之洲一飲一啄載沈載浮賞心利涉之地浴質至清之流

其年首選

同上

前進士沈光有洞庭樂賦韋八座岫謂朝賢曰此賦乃

一片宮商也後辟爲閩從事

北夢瑣言

宏農楊敬之撰華山賦朱崖李太尉每置座右行坐諷之其略云見若咫尺田千畝矣見若環堵城千雉矣見若杯水池百里矣見若蟻垤室九層矣醯雞往來周東西矣蠛蠓紛紜強秦去矣蜂巢聯聯構阿房矣俄而復然立建章矣小星奕奕焚咸陽矣累累蠶栗祖龍藏矣其十一作千載改更興一作與懷悲愁辛苦循其上矣楊氏華陰之茂族冠蓋甚遠此乃寄意于華山而言世事實雄才也同上

詞人卽事睹景懷古思舊感慨悲吟情不能已今舉其最工者如東坡昆陽城賦橫閭豁以四達故道宛其未



改彼野人之何知方偃僕而畦菜蓋人已逝而迹猶存  
迹雖存而景隨變古今詞云語言百出究其意趣大概  
不越諸此

林下偶談

晉公貞元中作鑄劍爲農器賦其首云皇帝之嗣位三  
十載寰海鏡清方隅砥平驅域中盡歸力穡示天下不  
復用兵憲宗平蕩宿寇數致太平正當元和十三年而  
晉公以文儒作相竟立殊勲爲章武佐命觀其辭賦氣  
概豈得無異日之事乎

因話錄

進士李爲作淚賦及輕薄暗小四賦竟不遠大文字之  
作可以定相命之優劣矣

同上

上藻鑒宏詞獨孤受所司試馴象賦及進其本上自覽  
考之稱歎者久因吟其句曰化之式孚則必受乎來獻  
物或違性斯用感于至仁上以受爲知去就故特書第  
三等

杜陽雜編

宋宣獻公綬宮楫詩云閭苑春多非世境層城花早出  
宮欄用梁簡文帝楫花賦曰層城之宮靈苑之中楫花  
特早偏能識春之語也

墨莊漫錄

四六叢話卷四 畢